

Il Grischun e la regiun autonoma Trentino-Alto Adige

■ La regiun autonoma taliana Trentino-Alto Adige (Trent-Tirol dal Sid) exista dapi il Contract da Saint-Germain dal 1919. Avant fascheva ella part dal contadi austriac Tirol. A quel era vegni attribui il 1804 en rom dal Recess da la Dieta imperiala il prinzi-uvestgieu da Trent ch'era avant formalmain independent (ma gia collià cun il Tirol entaifer il Sontg Imperi roman). La regiun odierna consista da las duas provinzas Bulsau-Tirol dal Sid e Trent che possedan omaduas vastas competenzas d'autodeterminaziun.

Tirol

Il Tirol furma la regiun al sidost da las Alps che cunfinescha a l'ost da la Svizra cun l'Engiadina Bassa e cun la Val Müstair. Il territori al nord dal Brenner furma il pajais federativ austriac dal Tirol, quel al sid dal Brenner e dal Pass da Raisch la regiun autonoma taliana Trentino-Alto Adige (Tirol dal Sid). En il temp medieval era il Tirol collià fermamain cun l'intschess cultural curretico. Nums rumantschs da lieus e da cultiras èn anc oz currents en il Vnuost, en las Dolomitas ed en la Val da l'En Superiura (Landeck, Puntina). En las vals dolomiticas è il rumantsch (ladin) anc vivent. L'Engiadina ha adina tgrirà stretgas relaziuns cun la Val da l'En Superiura (ruta ostvest) e cun l'intschess da l'Adisch fin al spazi adriatic (sur il Pass dal Fuorn).

En il temp autmedieval han ils uestegs da Cuira possedi en il Vnuost, ultra da la pussanza diocesan-ecclesiastica, era dretgs territorials seculars. A partir dal 12avel tschientaner èn ils signurs feudals ils pli pussants dal Vnuost, ils chastellans von Matsch, entrads sco vasals e ministerials en ina relaziun d'obligaziun envers l'uestegiu da Cuira. Ils conts de Tirol han acquistà il domini en la regiun da l'Adisch inferiura (Meraun), en la Val da l'Eisack, en il Pustertal sco era en las vals da l'En. Il conflict cun l'uestegiu da Cuira, che resguardava il Tirol anc il 1283 sco feud episcopal, han ils conts de Tirol decidì successivamain en lur favur. L'uestegiu da Cuira ha fatg valair ses dretgs suverans multifars sur la gliעד da la Chadé en il Vnuost Superiur fin viaden il 17avel tschientaner.

A partir dal 10avel tschientaner han ils conts de Tirol possedi era dretgs da contadi en l'Engiadina Bassa ed a partir dal 14avel tschientaner l'avugadia en las Otg Dretgiras, da las qualas ils Habsburgais èn sa patronads a partir dals onns 1460. Il 1478 ha il duca Sigmund d'Austria confermà a las dretgiras tut ils dretgs e tut las libertads ed ha garantì ad ellas l'exemziun da dazi en il Tirol. La gliעד



Plazza da Walther a Bulsau.

(FOTO: THOMAS MAX MÜLLER / PIXELIO)

da quests territoris eran d'ina vart libers Grischuns respectivamain alliads en la Republica da las Trais Lias, da l'autra vart subdits austriacs suttamess a la giustia ed a l'administraziun civila tirolaisa. Els han cumprà ora quels dretgs austriacs pir il 1649-52.

En il temp da fluriziun da l'industria da minieras en il Grischun (15avel/16avel tschientaner) han spezialists tirolais, lumbards e venezians explotà las minieras da fier tenor las pli modernas tecnicas da quel temp e millis Tirolais han lavurà sco miniers en il Grischun. Per incumbensa dal Tirol ha Christian Gadmer da Tavau, il pli enconuscent derschader da minieras e da cas criminals en servetsch da l'Austria, scrit in rapport davart tut las chavas da minerals e minieras da la Lia da las Diesch Dretgiras e dals signuradis da Razén e Munt S. Gieri. En las relaziuns tranter la Svizra ed il Tirol, tgriradas en ils temps da la reformaziun e da la Revolva dals purs tirolais, cumpara la figura interessanta da Michael Gaismaier. Quest manader revoluziunar dals purs tirolais, politicher, diplomat e filosof è fugì il 1526 en il Grischun (a Fadrein Bogn) ed a Turitg, nua ch'el ha fatg l'enconuschientscha dad Huldrych Zwingli. Qua ha el concepì il nov urden statal, la «Landesordnung» dal Tirol che cuntegna il concept per ina republica purila cristiana e democratica che n'ha dentant mai surpassà la fasa da projectaziun.

En il 17avel tschientaner ha fluri il commerzi tranter il Tirol ed il Grischun: products da latg da Tavau e da l'Engiadina Bassa vegnivan exportads en la Val da l'En tirolaisa, e dad Alla vegniva importà sal. A Puntina han exiliads u deportads dal Grischun chattà pliras giadas dimora, per exempel enturn il 1620 ed il 1799. Qua han studegià dapi la fundaziun da l'università 1671 Grischuns, prevalentamain da confessiun catolica, sco era numerus auters Svizzers, tranter ils quals ca. 300 da Son Gagl. En la guerra tranter la Frantscha e l'Austria dal 1809 ha la Svizra occupà sin cumond da Napoleun il cunfin cun il Tirol. La defensiun dal sector da cunfin Engiadina-Puschlav è sa demussada sco difficila, cunquai che bleras vischnancas grischunas simpatisavan cun ils revoltads ed als sustegnevan. Il Grischun ha schlià il problem a moda flexibla, senza serrar il cunfin per fugitivs e conscrits. Blers Tirolais lavuran oz sco forzas stagiunales en l'economia forestala ed alpestra sco era en la branscha turistica dal Grischun. (red.)

Meraun

Citad e lieu da cura en il district talian dal Burggrafnamt (Tirol dal Sid), situada betg lunsch davent da la sbuccada dal Passer en l'Adisch; talian Merano, tudestg Meran (omaduas furmas uffizialas). 2000 34 236 abitants. En vischinanza da Meraun sa chattan il vitg da Tirol e ses chastè. Qua residavan en il temp medieval ils conts dal Tirol. En il 13avel e 14avel tschientaner era Meraun in lieu da martgà fitg frequentà, nua ch'era nobels da la Currezia faschevan savens lur affars. Il 1239 ha Schwicker von Reichenberg vendì qua il chastè da Tarasp ed ulterior possess en l'Engiadina al cont Albert von Tirol. Els uestegs da Cuira Sigfrid (1299 e 1310) e Johann (1328) han concedì perduns e consecrà baselgias a Meraun. Ils conts de Werdenberg-Sargans possedevan en la citad veglia da Meraun ina chasa en feud. Durant la Guerra svabaisa, suenter la sconfitta dals Tirolais en la Guerra da la Chalavaina e l'invasiun da rapina dals Grischuns en il Vnuost la fin da matg 1499, è Meraun entrà en conflict cun las Trais Lias. A quell'ocasiun èn vegnids mazzads 36 ostagis grischuns. Meraun è daventà in lieu da refugi per ils Grischuns proscrits u entretschads en relaziuns da tensiun cun las autoritads. Enturn il 1578 èn sa trategnids qua l'uesteg da Cuira Beatus a Porta e ses frar Caspar, chapitani sin la Fürstenburg. Enturn il 1618 è il chavalier Rudolf von Planta, in aderent da l'Austria, fugì a Meraun ed ha acquistà la residenza nobla da Rametz ed il 1625 il chastè da Greifen che sa numna anc oz chastè da Planta e che stat sut la protecziun da monuments.

Il 1799 è l'uesteg da Cuira, Karl Rudolf Buol, fugì a Meraun per scappar da l'invasiun franzosa. El ha dirigì da là davent durant otg onns l'uestegiu da Cuira, per il qual ses chaplon Gottfried Purtscher da Danuder aveva creà in seminari da spirituals. A partir dal fanadur 1800 ha Meraun era dà refugi als commembers da la Regenza interimala («austriaca») dal Grischun. Cura ch'il Tirol è vegni cedi a la Baviera tras il contract da pasch da Pressburg il 1805, è l'uesteg vegni bandischà da Meraun e spedi a Cuira.



Vista panoramica da la regiun da Trent.

PD)

Enturn il 1890 ha in comité d'iniziativa sut la direziun da l'antierur cusseglier dals chantuns Florian Gengel preschenta ses plans per la construcziun d'ina viafier a binari normal da Cuira via l'Alvra ed il Pass dal Fuorn a Meraun; il project n'è dentant mai vegni realisà. En il 20avel tschientaner èn sa sviluppads Meraun e ses conturn ad ina destinaziun turistica preferida da blers Svizzers pervia dal clima miaivel ed il vin da Kaltern.

Martin Bundi

Bulsau

Chapitala da la provinza da Bulsau en l'Italia dal Nord (Val da l'Adisch), situada a la crusçada da pass alpins impurtants, talian Bolzano, ladin Bulsan, tudestg Bozen. En il temp roman sa chattava Bulsau al cunfin meridional da la provinza Rezia. En il temp medieval regiva qua in viv barat da martganzia e da cultura tranter la regiun da l'Adria/Vaniescha ed il Tirol dal Nord (sur il Brenner) respectivamain il Grischun (sur il Vnuost/Fuorn). En il temp medieval tardiv è Bulsau stà temporarmain residenza da ducas austriacs ch'han contractà qua tranter auter era cun ils signurs de Ramosch areguard il chastè da Ramosch (1365), cun Eglolf von Ems concernent la summa da pegn per Weesen e Glaruna (1370) e cun il cont Friedrich VII von

Toggenburg concernent l'amortisaziun dals debits austriacs (1403). Il famus martgà da Bulsau ha attratg en il temp medieval tardiv visitaders tant da la regiun da Vaniescha sco dal Grischun. En il temp modern èn questas relaziuns vegnidas interruttas. Il 1880 ha Andreas Rudolf de Planta preschenta in project per ina viafier da Cuira a Bulsau – Triest sco part centrala d'ina lingia da viafier Paris – Constantinopel, cun l'intent da reactivar las veglias relaziuns commerzialas e culturalas. Malgrà il sustegn da la Chombra da commerzi da Bulsau, n'ha l'idea betg pudì sa far valair visavi la Viafier da l'Arberg.

Martin Bundi

Trent

Chapitala da la provinza da Trent situada en l'Italia dal Nord a la sbuccada da la Val Sugana en la Val da l'Adisch, talian Trento, tudestg Trient. Center da traffic al pe dals pass alpins dal Brenner e dal Raisch. Sur il domini langobard è il Tridentum roman daventà la sedia d'in ducadi. A partir dal 950 ha l'imperatur Otto il Grond incorporà Trent sco part dal territori da Verona a l'Imperi tudestg. Dapi l'entschatta dal 11avel tschientaner furmava Trent in uestegiu ed in principadi imperial ecclesiastic che possedevegia il contadi da Bulsau. Cun la cessiun dal contadi dal Vnuost tras l'imperatur Konrad II il 1027 ha Trent pudì extender considerablamain sia pussanza. Els conts de Tirol han però impedi sco chastellans dal chapitelatedral il svilup da Trent a la suveranità territoriala cumplina cun sa patronar en il 13avel tschientaner da numerus dretgs e bains. En il Vnuost hai dà interferenzas da dretgs tranter ils uestegies da Trent e Cuira. Il 1226 èn sa cunvegndis l'uesteg da Cuira Rudolf von



Il Tirol istoric cun ils cunfins d'avant l'Emprima Guerra mundiala.

PD)

Lexicon Istoric Retic

Il LIR cumpiglia bundant 3100 artgels (geografics, tematics, artgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.